

殊

域

周

咨

錄

殊域周咨錄卷之十六

行人司行人刑科右給事中嘉禾嚴從簡楫

揚州府學訓導長洲彭天翔

江都縣學訓導華容王三汲校

北狄

夫天地嚴凝之氣聚於玄冥之區其風剛勁故
虜爲中國患獨強若匈奴突厥契丹女真蒙古
代相踵焉亦如梟之不能不啄虎之不能不噬
乃性氣使然耳古聖王馭狄之道來則驅之詩

曰薄伐玁狁至於太原是已去則脩之詩曰王
命南仲城彼朔方是已未聞有使之通也漢高
自爲和親之後嗣後乘軒出疆者不勝其載而
漢時蘇武常惠鄭衆守節不屈高風振拂由此
其選也迨上道宋之與契丹景德輸平之後王
帛往來使輅不絕者百年然燕雲平等山前後
十四州未復大險淪虜大防決華而兵力不競
徒恃和好其如國勢日弱啓宣和靖康之侮何
哉則有脩無患待虜之不可不嚴自古尚矣

國家蕩滌胡腥修復秦漢以後邊防洪武間東西紫
塞綿亘相延萬里其外密邇龍沙屯戍兵衆乃
設陝西行都司於甘州山西行都司於大同萬
全都司於宣府又於慶峰口北古惠州地設大
寧都司并遼東都司爲五邊陝西寧夏即趙元
昊所居地設寧夏左等五衛亦爲重鎮時則封
肅王於甘州慶王於寧夏代王於大同谷王於
宣府寧王於大寧遼王於廣寧并

燕邸爲七而作藩屏捍禦騎虜

藩王原封瀋陽此時未就國

凡有

不廷

命諸王討之所以三十餘年胡馬不敢南牧是守在親藩也末樂之初遷寧王于江西遼王於荊州谷王于長沙獨存肅慶代於各邊而兵權皆釋成祖六飛凡五度陰山犬羊褫魄則

天子自將其後因寧鎮廢則倚薊州爲重東勝五衛廢則倚三關爲重黃河套不能有則倚延綏爲重并陝西總制所在固原爲鎮而九邊峙焉舊設總制于固原控延寧甘三邊今改駐花馬池

而移陝西巡撫之駐固原控鴈門等關者命山西巡撫兼之近別設總督於保定控薊州等處正統以前宿將猶在列於幕府刁斗相聞無事則屯兵養銳而聲勢之相應有事則挾矢奮威而肘臂之相援至今猶守其遺法苟選將得人亦足以禦外侮是守在各邊也初靖難武成即徙大寧都司於保定而其所統營州等八衛移之關內及都司附郭乃裂大寧地自古北口至山海關隸朶顏衛自廣寧前屯衛西至廣寧鎮

白雲山隸秦寧衛自白雲山以北至開原隸福
餘亦作富峪衛自後洪武五邊失一末樂中遂
不復收而幽燕東北之險中國與夷狄共之胡
馬疾馳半日可抵闕下廣寧錦義等城復與宣
府懷來隔斷懸絕聲不相聯且近年逆帥勾虜
直入關內震驚

廟社於是築重城于京師之南而文武百僚分堵爲
禦迄今尚不能絕虜之唾涎是守在朝廷也夫
守在親藩乃開國之權宜守在各邊則保邦之

長策守存

朝廷豈不岌岌乎殆哉

宣宗皇帝巡邊搗虜大寧出其不意於鑠王師有光
祖烈若於此時盡收故地復歸職方則金甌無缺而
有苞桑之固矣此萬世臣民之遺恨也三楊不
能無罪不寧惟是舊開平即元之上都西接興
和而達東勝亭障烽埃悉棄與虜東西千里遼
河之間三公河之北賀蘭山西鎮番衛之東久
矣非吾守者輿圖所及一寸山河一寸金豈可

以鄰沙漠之地遂棄之也哉凡今清署

指行人司言

喜覩干羽之舞厭聞小醜之談然天下國家皆
吾分內而八城不守土木之變我寮若尹昌羅
如墉雖非死於啗命實亦爲此虜而致身焉今
其可忘杞人之憂乎况邊境靖謐則四牡之道
坦安中國常尊則王人之體益重于使局亦有
係也故考幽都諸部次第韃韃爲最要兀良哈
次之稍東則連女直志北狄

韃韃

韃靼北胡也東自兀良哈西抵瓦剌種類不一兀
良哈亦在內但久內附爲屬夷故別出耳歷代名
稱各異夏曰獯鬻周曰玁狁秦漢皆曰匈奴唐曰
突厥宋曰契丹匈奴在兩漢之世始合而強後分
而弱烏桓繼興漢末鮮卑滅烏桓盡有其地後魏
烏桓又弱蠕蠕獨強蠕蠕滅而突厥興盡有西北
地唐貞觀初李靖滅之五代及宋契丹復盛與宋
爲敵國後滅於女真別建國曰西遼後復滅於蒙
古別部小者曰泰赤烏曰塔塔兒曰克烈各據分

地俱爲蒙古所併遂入中國代宋稱號曰元八傳而天下大亂

四明黃溥著閑中今古編云北狄稱銀曰蒙古胡元之先國號蒙古者因女真號國曰金乃以銀號其國也後歷世祖方改號元此說恐非

國朝受命肅清江南傳檄中原命大將軍徐達常遇春等北伐凡齊魯河洛悉還中國洪武元年八月我兵至通州取元都元主率三宮后妃太子開建德門北奔開平達自齊化門入執其監國宗室淮

王帖木兒等戮之獲王印二王璽二封其宮殿及
府庫圖籍寶物遣使獻捷奉宮人妃主令其宦寺
護侍奉平胡表至京

表曰五百年而王者興仰

聖人之在御大一統而天下治際景命之惟新長驅
胡虜之腥羶誕布幅員之聲教乾坤清肅日月
光明欽惟

皇帝陛下天賦聖神德全勇智握赤符而啓運仗黃
鉞以興師造攻淦陽黎庶有來蘇之望開基建

業英雄識

真主之歸顧豺狼之噬人正蛇龍之起陸爰飭徒旅
肅將天威江漢徂征友諒身殲於彭蠡荆吳薄
伐士誠面縛於姑蘇連逃驅而閩越安僭僞平
而交廣定立綱陳紀治具畢張發政施仁民心
大悅東南已樂於生遂西北尚困於勛勦推其
所由厥有攸緒惟彼元氏始自窮荒乘宋祚之
告終突胡群而崛起以夷狄而干天紀以大牟
而亂華風崇編髮而章縫是遺系族姓而彛倫

似數逮乎後嗣尤爲不君耽逸樂於荒亡昧乎
兢業作奇枝而淫巧溺於驕奢天變警而靡常
河流蕩而橫決罔知修省惟務耽遊朝廷之政
下移英雄之志斯奮兵連寰宇禍結中原是用
弔伐以拯顛連誕舉安攘而靖亂畧事非獲已
謀乃僉同顧惟一介之非才忝受總戎之重任
臨軒授鉞俾救民於水火之中分閫握機幸折
衝於尊俎之外旌旗揮而淮沂下金鼓震而青
兗平濟水盡曳其兵萊陽競崩厥角風驅雷勵

直擣大梁電掣皇馳旋收西洛濟師以畧衛相
卷甲而趨邯鄲率樓櫓發臨清先聲動如破竹
策貔貅克通路大勢疾若燎毛鎮戍潰而土崩
禁衛墮而瓦解君臣相顧於窮迫父子乃謀於
遁逃朝集內殿之嬪妃夜走北門之車馬臣與
遇春等已於八月初二日勒兵入其都城壺漿
以迎去戴盆而迴白日室家相慶廓氛祲以覩
青天宣德威以安黔黎收圖籍而封府庫列郡
之謳歌四集百年之汚染一新驅馳雖效於微

勞方畧實遵乎成筭所以聿彰鴻烈考定武功
東滄海而西崑崙南雕題而北窮髮無有遠邇
莫不尊親玉帛會車書同與太平之禮樂人紀
脩風俗變正萬年之綱常

按至正十二三年杭潮常不波十九年帝都子
規啼至二十二年順帝夢猪哄大都城覆遂禁
軍民畜猪天兵未至京一月有鸚鵡鳴端明殿
作滅胡之聲帝命善射者射之終莫能中天兵
既至柳林遲明帝召百官議戰守之計忽有二

狐自內殿出帝嘆且泣曰宮禁嚴密此物何得
以至非天之所以告朕哉即命開建德門北去
實二十七年九月也明年

太祖聞其居應昌馳書示以禍福因咨討曰金陵使
者渡江來漠漠風烟一道開王氣有時還自息
皇恩何處不昭回信知海內皆王土亦喜江南
有俊才歸去誠心煩爲說春風先到鳳凰臺鳴
呼杜鵑啼汴人謂地氣自南而北尚知亂將作
矣况至于燕乎杭潮三日不至宋社墟矣况迄

二年之不波乎後乃歷歷多恠豈非猪乃朱姓
而狐乃胡人哉觀其嘆泣長往答詩知道謚以
順帝不亦宜乎野史訛爲中山王執而縱之非
也 程學士敏政衷緝宋遺民錄一書末卷辯
宋瀛國公之事亦旣明矣惜所引陶九成輟耕
錄西江月詞尚未解明其詞云九九乾坤已定
清明節後開花米田天下亂如麻直待龍蛇繼
馬依舊中華福地古月一陣還家當初指望壅
生涯死在西江月下陶以爲真武之降筆程以

爲劉秉忠作此姑置之其初二句乃言元世祖
滅宋德祐封爲瀛國公時至順帝至正十五年
我

太祖三月起兵和陽正當九九八十一年之數是知
乾坤已定九九而三月清明時也米田言番人
也直待龍蛇繼馬是

太祖至正甲辰建國即位乙巳伐元至丙午元亡豈
非龍蛇繼馬耶古月一陣還家乃言胡人皆去
此矣當初指望甕生涯此寧宗之後甕占刺底

不立己子而取順帝是無生涯矣程註云元主
皆取甕吉刺氏爲後而此云指望甕生生涯蓋陰
寓順帝非甕吉刺氏所出之意也然考之元惟
七主娶弘吉刺氏餘皆他姓且弘吉非甕吉不
知程何所據死在西江月下獨言順帝北殂於
應昌取西江寺梁爲棺之驗耳

元主之北奔也命擴廓帖木兒犯燕京至是擴廓
出鴈門欲寇保安攻居庸時大將軍達將發北平
定太原人或止之達曰擴廓遠出太原必虛我乘

其不脩直傾巢穴所謂批吭擣虛也彼若還抹則
已爲我牽制進退失利無不成禽且彼縣軍遠道
雖至北平孫都督足能禦之矣諸將曰善遂引兵
進廓擴聞之遁還後爲大將軍所破孫都督名興
祖時守北平二年春正月參將傅友德及元脫
列伯戰于宣德敗之詔吏民內徙以元主雖禽遁
孽數出沒且斥堠未立保聚爲難故也擴廓即生保保

或問徙民尹畊曰

尹畊宣大人頗諳邊務後多採其論述焉

皇祖不得已也邊土爲虜巢穴者垂二百年矣一日

空之何得無擾是故宋人不能有其地則生口
是俘

國初不能已其害則吏民內徙正一時之權也然則
光武之徙民何以爲失策曰光武之時四郡未
廢經畧猶存爲厲梗者盧芳而已一戰勝之比
跡西京矣而不尋遠畧輕自蹙境故論者憾之
乃若

國初山川之淪棄旣深州郡之紀綱掃盡遺胡殘虜
遍于郊原已去而復來旣離而復合擴廓逋遁

列伯之戰旋聞開平雖定驢兒之居自若何可
與建武並論也

皇祖始則急其害而徙民旣則圖其成以置鎮時宜
之道存而不得已之意見矣

先是元主在開平

詔留兵二萬分隸都督孫興祖守燕達及副將軍常
遇春督諸將西下太原達乃遣右丞薛顯叅政傅
友德陸聚取大同禽元裔右丞等三十四人以歸
擴廓寇保安聞王師擣太原遁還大將軍達遣傅

友德擊之兵未及陣擴廓以萬騎突至友德率敢死士戰却之副將軍遇春曰我步彼騎戰懼不利不若伺夜斫其營達曰善會擴廓將豁鼻馬遣人約降請爲內應于是選騎夜襲之擴廓方燃燭坐帳中聞兵至不知所爲納靴未竟跣一足踰帳後乘驕馬從十八騎以遁北奔大同遇春以兵追之至忻州不及而還遇春復率諸將郭英湯和耿炳文汪興祖陳德謝成郭子興北伐擴廓奔甘肅其守將竹真亦棄城遁遂取大同

按大同自石晉割棄之後至是四百餘年始復歸于中國其淪沒之久亦可悲哉

二月都督汪興祖來守大同將宣武振武崑山三衛兵兩敗元兵斬獲甚衆

此本朝將臣鎮守大同之始

命都指

揮常守往屯寧武駐兵寧化

此經理寧武之始

三月都督

興祖取武朔州禽元知院馬廣等六百三十四人

詔以興祖爲晉王武傳兼山西行都督府事元

也速寇通州征虜將軍常遇春與將軍達破擴廓

西平秦隴乃詔遇春率諸將李文忠湯勝等東拒

也速遇春乃擣末平過惠州收江文清士馬進次
大寧也速聞之北走遇春遂北取開平元主奔于
應昌追至北河俘其宗王三人及平章鼎位軍士
數萬置開平衛初太史劉基奏立軍衛自京師達
于郡縣大率以五千六百名爲一衛一千一百二
十名爲一所一百十二名爲一百戶所每一百戶
下設總旗二名小旗十名通以指揮使等官領之
至是置衛于開平 秋八月元脫列伯寇大同偏
將軍李文忠右丞趙庸擊破之副將軍遇春之北

伐還也次柳河川而卒僅年四十報至

上爲之悲慟詔文忠代將其軍援大將軍達于慶陽
文忠至太原聞達已下慶陽而脫列伯攻大同甚
急文忠與庸謀曰吾等節將閩外之事有利于國
專之可也今大同受圍若俟進止恐失機會于是
率諸將譚濟馮勝等出鴈門過馬邑抵梅峪口遇
元邏騎數千與戰敗之禽其平章劉帖木進次白
楊門又禽所謂四王者時雨雪文忠疑有伏自
率數騎入山覘之會前軍去大同四十里止壁文

忠至驚曰此豈駐兵地邪虜來敗矣麾之令前五里阻水而壁密遣人間行達城中與都督興祖期是夜脫列伯悉衆來攻文忠令將士秣蓐食堅壁不動以二營委敵督令死戰不之抹自寅至辰度其饑疲乃分軍爲兩翼鼓行疾馳薄其陣聲撼林木城中亦開門出戰腹背奮擊大破之追至炭窖禽脫列伯降其衆萬餘輜重無筭遂進兵東勝州至莽哥倉而還遣使致書元主曰朕本布衣因海內鼎沸不能自寧靜觀群雄割據荼毒生靈

於心不忍君又不能控禦致諸將各懷不軌外爲
元臣內實自謀靡有戡定禍亂以安生民者乃親
率諸將西平湖湘漢沔南取交廣東定吳越八閩
兩江皆入版圖朕欲息兵以觀君之爲計而君之
將臣張思道李思齊王保保三人者不爲國謀分
據秦晉互相讐殺民遭塗炭朕乃命大將軍自前
歲出由齊魯經河洛次燕趙我師未至君已棄宗
社去朕謂君自知胡無百年之運能順天道歸我
中國故土上策也未幾邇將來報君率殘兵留連

開平朕思君前日宗社真安國用富實尚不能削
平群盜今遠寄沙漠欲效漢之匈奴唐之突厥出
沒不常以爲邊患是君之計不審也方今中國封
疆盡爲我有華夏已平外夷咸附若命將出師直
抵陰山之北則君雖有百萬之衆亦不過死灰之
餘燼涸轍之朽鮒耳何能爲哉比時君卽遁逃亦
將無所往矣朕以誠心待人明示機策改圖易慮
安分順天以存宗祀不亦善乎君其圖之 初元
主北奔命脫列伯孔興以重兵攻大同規恢復及

是脫列伯就禽孔興走綏德爲其下斬以降元主
知事不濟乃絕意北竄都督汪興祖時守大同而
興和諸處俱未下元孽時出沒興祖乃以大同兵
來取興和三年春二月叅政華雲龍率諸將廖
美孫恭攻雲州萬戶譚濟出居庸夾擊之取其城
獲元平章人兒忽答右丞哈海指揮金朝興來取
東勝禽元平章荆麟等十八人平章湯和來取宣
德追元兵至察院惱兒獲其將虎陳故元將王保
保卽擴廓知大軍南還自定西引兵圍蘭州指揮

張溫堅守不與戰以待援兵時鷹揚衛指揮于光
守鞏昌將兵來援至蘭州之馬蘭灘卒遇保保兵
戰敗被執至蘭州城下使喚張溫出降光大呼曰
我不幸被執公等堅守徐總兵將大軍至矣敵怒
殺之城中聞光言守益固保保進攻不利且懼大
軍至乃引去光字大用南康都昌人自少磊落有
大志徐壽輝初起畧湖口陷都昌畧光爲江東宣
慰陳友諒弒壽輝光乃輕騎謁

上于龍江授行樞密院判官從上征九江下黃梅戰

鄱陽降武昌皆預有功歷遷鷹揚衛指揮使從徐達平淮東浙西擒張士誠取汴梁克陝洛下潼關同都督郭興守之後移守鞏昌王保保屢引兵來攻光輒擊却之至是被執而死

上聞之遣官諭祭尋命配享功臣廟

按左傳宣公十五年晉使解揚如宋使無降楚鄭人執解揚而獻諸楚楚子厚賂之使反其言而解揚呼宋人卒致晉君之命楚子舍之是楚雖夷狄猶知信義若王保保者乃殺于光真獸

類矣顧猶爲亡元致力焉何哉

上問諸將曰王保保爲患今欲出師往沙漠當何先
諸將曰保保寇邊以元主在若出師直取元主則
保保失勢不戰而可降也

上曰忘近而取遠失緩急之宜吾意欲分兵爲二道
一令大將軍達出潼關自安定擣定西以擒王保
保一令副將軍文忠出居庸入沙漠以追元主使
其彼此自救不暇應援取之必矣諸將皆曰善受
命而行尋遣使賁書諭元主曰前者二次遣使致

書久而未還豈被留而然乎以予計之殆君之失
謀也君之意必曰吾嘗爲天下主以四海爲家彼
昔吾之民耳豈可與通問乎自常情言之固宜如
此以理勢論之則大不然君者天下之義主顧天
命人心何如耳蓋天命之去留由人心之向背古
語云民猶水也君猶舟也水能載舟亦能覆舟君
豈不知此而乃固執不回乎今日之事非予所欲
實以四方兵爭所在紛擾予當其時不能自寧於
鄉里豈有意於天下乎群雄無所成而予兵力日

以強盛勢不容已故有今日此誠天命非人力也
君又何致怨於其間邪君其奉天道順人事遣使
通好庶幾得牧養於近塞籍我之威號令其部落
尚可爲一方之主以奉其宗祀若計不出此猶欲
以殘兵出沒爲邊氓患則予大舉六師深入沙漠
君將悔之無及矣近北平守將以雲州所獲平章
火兒忽答右丞哈海等八人至京詢之皆君倚任
之人是用待以不死今再令賫書詣前惟君其審
圖之徐達率師出安定駐沈兒峪口與王保保

隔深溝而壘日數交戰王保保發兵千餘人由間道從東山下潛劫東南壘左丞胡德濟倉卒不知所措我師敗績達親率兵急擊之敵乃退遂斬東南壘指揮及將校數人以徇軍中股栗明日整衆出戰諸將爭奮莫敢不力遂大敗保保兵於川北亂塚間保保幾被擒僅與其妻子數人從古城北遁去

上遣書諭元太子愛猷識理達剌曰君之將擴廓帖木兒自太原奔潰後以烏合之衆犯我蘭州大軍

進討追及定西今年四月七日大敗其衆斬馘無
筭生擒嚴奉先韓禮兒李察罕不花等惟擴廓帖
木兒遁去已命將追捕旦夕必就擒近綏德衛擒
送平章徹里帖木兒問知爲君舊用之人特命賫
書致意事進退之宜適元史告成朕以令先君各
三十餘年之主不可無謚以垂後世用謚曰順已
著于史君之子買的八剌亦封崇禮侯歲給食祿
及其來者與之同居無恙但不知君之爲况何如
君其審之 李文忠由開平進兵復取應昌時元

主已殂其子愛猷識理達剌聞兵遁去文忠追至北慶州不及而還獲元主孫買的里八剌及后妃宮女并諸官屬朔庭遂空是役也裨將孫虎戰沒驍恤有加文忠奏捷

上乃皮弁服御奉天殿百官具朝服侍班侍儀使引買的里八剌具本俗冠服朝見行五拜禮至東宮見皇太子四拜其母及妃朝見坤寧宮命婦具冠服侍班朝畢俱賜以中國冠服并賜第宅於龍廣山命優廩餼封買的里八剌爲崇禮侯詔曰昔帝

王之有天下必封前代子孫使作賓王家其來尚
矣曩因元失其政四海分爭朕以武功削平群雄
混一區宇爲天下主而買的里八剌實爲元之宗
孫比者遣將北征爾祖已殂既克應昌爾乃來歸
朕念帝王之後爰稽古制錫以侯封爾其夙夜恭
稱朕優禮之意

上謂省臣曰朕見前代帝王革命之際獲亡國后妃
往往不以禮遇欺孤寡非盛德所爲朕甚不取
今元后脫忽思氏在此北狄但知食肉飲酪且不

耐暑熱飲食居第務適其宜焉若其欲歸當遣還
沙漠

上擢元臣危素爲大學士與劉基胡鉉等同侍弘文
館素字太朴金谿人元時爲侍講至右丞徐達收
燕令故臣投告身素與編修黃礙誓同死礙竟死
而素爲報國寺僧所阻達以素歸授侍講學士特
脩顧問

上以素老賜小車免朝謁一日

上御東閣聞履聲橐橐上方詰之而素適至乃謂

之曰是汝吾以爲文天祥邪未幾御史王著等劾素亡國之臣不宜居侍從乃謫居和州之含山又有張昖者仕元爲戶部尚書以奉使來朝

上因見其才敏留用之累授叅政昖外示誠款內懷陰計與楊憲胡惟庸皆相善昖有才辯知識明決熟于前代典故凡國家建置制度多出昖手裁決如流事無停滯昖恒自以元臣失節謂不能無議已者心常快快時擴廓帖木兒兵尚強元都未下昖竊語其所親曰吾若得歸元是所願也間使人

上書頌功德勸

上及時娛樂 上以語太史令劉基曰是欲爲趙高也基曰誠如聖見必有使之者 上不欲窮治斥焚其書復勸 上嚴刑法重賦役多陳厲民之術欲 上失人心陰爲元計 上皆不從昶不自安時元主謂昶已死贈昶官謚擢用其子會平章李文忠下杭州以元平章長壽丑的等至京師上釋之遣歸元昶乃陰托長壽丑的奉表于元且寓書其子詢存亡會昶卧病憲往候偶于昶卧內得書

表遂奏之

上命大都督府按問和書八字于牘曰身在江南心思塞北 上始惜其才猶欲存之及得其所書牘詞曰彼意叛矣是何赦焉遂誅之 初李文忠捷奏至時百官方奏事奉天門聞元主殂遂相率稱賀上曰元主守位三十餘年荒淫自恣遂至於此因謂治書侍御史劉炳曰爾本元臣今日之捷爾不當賀因命禮部榜示凡北方捷至嘗仕元者不許稱賀 文忠遣送買的里八剌等至京師省臣楊憲

等請獻俘于廟

上曰古者雖有獻俘之禮武王伐殷曾用之乎憲曰武王事不可知唐太宗嘗行之上曰太宗是待王世充若遇隋之子孫恐不行此禮元雖夷狄入主中國百年之內生齒浩繁家給人足朕之祖父亦預享其太平雖古有獻俘之禮不忍加之只令服本俗衣以朝朝畢賜以中國衣冠就令謝恩復謂憲曰故國之妃朝于君者原有此禮不必效之但令衣本俗服於中宮朝見見畢賜之中國服亦令

就謝

按我

祖開基雖延攬英雄不問其類而於節義所在特加
之意故干戈未定而余闕李黼之死建祠肖像
唯恐或後北方捷至則嘗仕元者不許稱賀其
扶植綱常培養節氣而爲萬世人臣立極奚暇
顧一時左右之難堪哉旣而建文之朝遂多死
難之士感應之機真捷若影嚮矣

按李文忠之入燕也仁恩著于市肆之不易威

聲播于擴廓之窮奔分友德以西巡付興祖以
留後其制置可謂周矣若夫開平之于上都岐
陽之於應昌也捷奏朝馳隼旗夕返留兵置將
俱所未聞卒之燕京磐石而二地淪夷則識者
不能無憾焉

遣使往紹興至宋理宗頂骨先是

上與侍講學士危素論宋元興替素因言元世祖至
元間胡僧嗣古妙高歆毀宋會稽諸陵時夏人楊
輦真伽爲江南總攝奏請如二僧言遂發諸陵取

其金寶以諸帝遺骨瘞于杭之故宮築浮屠於其上以厭之又截理宗頂骨爲西僧飲器天下聞之莫不傷心上嘆息久之謂素曰宋南渡諸君無大失德與元又非世仇元旣乘其弱取之何乃復肆酷如是耶卽命北平守將吳勉訪索頂骨所在果得諸西僧廬中命有司厝於京城之南至是紹興府以永穆陵圖來獻遂勅塋于故陵山西行省言大同糧儲路遠費重若令商人於大同倉入米一石太原倉入米一石三斗給長蘆淮鹽各一

引二百斤則轉輸之費省而軍儲之用充矣從之徐達李文忠等班師還至龍江車駕出勞于江上達等奉車駕還宮明日

上御奉天殿達等上平沙漠表稱賀詔議賞征討

將士大封功臣李善長韓國公徐達魏國公常

遇春之子茂鄭國公李文忠曹國公馮勝宋國公

鄧愈衛國公湯和中山侯其諸唐勝宗陸仲亨等

二十六人皆封侯食祿有差並賜誥券世襲惟善

長稱守正文臣餘皆宣力武臣封汪廣洋忠勤伯

劉基誠意伯亦稱守正文臣子孫不世襲

上大宴諸功臣宴畢因語之曰天下大業以艱難得之必當以艱難守之卿等今皆安享爵位不可忘艱難之時人之常情每謹於憂患而忽於宴安不知憂患之來常始於燕安也今日與卿等宴飲極歡恐久而忘其艱難故相戒勉明日徐達率諸將詣闕謝

上退御華蓋殿賜達等坐從容語之曰曩者與卿等初起鄉土本圖自全非有意於天下及渡江以來

觀群雄所爲無救民之心徒爲生民之患若張士
誠陳友諒尤爲巨蠹士誠恃其財富侈而無箴友
諒恃其兵強暴而無恩朕獨無所恃所恃者卿等
一心共濟艱危初與二寇相持人有勸朕先擊士
誠以爲士誠切近友諒稍遠若先擊友諒則士誠
必乘我後此亦一計然不知友諒剽而輕士誠狡
而懦友諒之志驕士誠之器小志驕則好生事器
小則無遠圖故友諒鄱陽之役與戰宜速吾知士
誠必不能越姑蘇一步以爲之援也向若先攻士

誠則姑蘇之城并力堅守友諒必空國而來我將
徹姑蘇之師以禦之則疲於應敵事有難爲朕之
所以取二寇者固自有先後也二寇旣除兵力有
餘鼓行中原宜無不下或勸朕盪平群寇乃取元
都若等又欲直走元都兼舉隴蜀皆未合朕意朕
所以命卿等先取山東次及河洛者先聲旣震幽
薊自傾且朕親駐大梁止潼關之兵者知張思道
李思齊王保保皆自戰之餘未肯遽降急之非北
走元都則西走隴蜀并力一隅未易定也故出其

不意反旃而北元衆膽落不戰而奔然後西征張
李二人望絕勢窮不勞而克惟王保保猶力戰以
拒朕師向使若等未平元都而先與之角力彼人
望未絕困獸猶鬪聲勢相聞勝負未可知也事勢
與友諒士誠又正相反至於閩廣傳檄而定區區
巴蜀恃其險遠此特餘事耳若等可以少解甲冑
之勞矣於是達等皆頓首謝

上已大封功臣思存者得膺爵賞死者不及一見乃
設壇親祭之且撫其子孫俾食其祿又設壇祭戰

歿軍士養其父母妻子復命禮部凡武官有遷塋者皆官備祭物道里遠者給其費禮部以品秩次第定給有差 四年春二月元臣鱸兒有衆萬餘歲窺伺畿外至是入居常峪夏四月詔招降比虜仍以 璽書諭驢兒曰三月間罕帖木兒火者歸言將軍駐常峪又將移營東去將軍能事幼主自是世間美事但恐幼主失所群臣中強者自立弱者從之將軍能忘君以事讐乎驅兵向之又恐力有不贍何若通使于我結大丈夫之知他日遇難

相托爲依庶進退有據也秋八月虜平章僧家奴
北牙頭以兵寇雲州華雲龍偵知之潛以精兵迎
襲突入其營禽僧家奴并獲駝馬四百餘遂分遣
裨將趙端等追擊至開平大石崖比分攻劉學士
諸寨克之端中飛石傷左腿右臂甚重督戰不置
復追驢兒破其軍遂取開平諸寨歸前所徙吏議
復立故州縣 故元遼陽行省平章劉益以遼東
州郡地圖并籍其兵馬錢糧數遣使奉表來降詔
置遼東衛指揮使司以益爲指揮同知 遼東衛

遣人奏言元將唃哈出據金山擾邊爲遼陽患乞
益兵以備乃遣黃儔齎書諭唃哈出曰前者萬戶
黃儔聞將軍威震遼左英資如是足以保定一
方然既往不復君子當察昔在趙宋君主天下立
綱陳紀黎庶奠安逮至末年權綱解紐故元太祖
興于朔方世祖入統中國此皆天道非人力也元
之疆宇非不廣人民非不多甲兵非不衆城郭非
不堅及紅巾起于汝潁群盜徧于中原名僭號者
繼出小明王稱帝于亳徐真一稱帝于蘄地陳友

諒稱帝于九江張士誠稱王於姑蘇明昇稱帝于
西蜀彼四帝一王皆擁兵數萬割據中夏踰二十
年朕本淮民爲群雄所逼因集衆禦亂遂渡江與
將軍會于太平比待他俘特加禮遇且知將軍爲
名家故縱北歸今又十七年矣朕見群雄無成調
兵四出北定中原南定閩越東取方氏西收巴蜀
四帝一王皆爲俘虜惟元君奔北自亡華夷悉定
天下大安此天命非人力也近聞將軍居金山大
張威令吾兵亦守遼左與將軍旌旗相望將軍若

能遣使通問貢獻姑容就彼順其水草猶可自逞
一方不然胡無百年之運大厦旣傾非一木可支
釁之後先惟將軍自思之儔至金山唘哈出拘留
不遣 五年春正月

上御武樓與諸將臣籌邊徐達曰今天下大定惟王
保保遁居和林出沒邊境臣願率將勦絕之

上曰卿等必欲征之須兵幾何達曰得兵十萬足矣
上曰兵須十五萬分三道以進於是命達出鴈門李
文忠出應昌馮勝出金蘭達至嶺北戰不利而還

延安侯唐勝宗往築寧化城率千戶唐成等勦野
寇四達子等部落指揮謝彥來守朔州 秋七月
時諸將北征指揮章存道從中山侯湯和守合墾
不刺營至斷頭山遇虜力戰死之斷頭山在陽和
北境外

按此和林之偏師也我軍鮮利

高皇蓋數悔之抑聞之長老曰存道驍將其死可惜
又曰斷頭名惡兵家忌焉時有勸存道移軍者
不從卒敗噫武王以甲子興豈有是邪雖然栢

人彭亡落鳳狼牙在古亦有是說矣將寘數有
適會與

都督藍玉兵至土剌河遇王保保擊敗之保保遁
去 馮勝傳反德率師至甘肅故元將上都驢降
李文忠追虜至土剌河虜將哈刺章悉騎渡河文
忠督兵搏戰宣寧侯曹良臣指揮周顥常榮張耀
俱戰歿文忠馬中流矢指揮李榮以所乘馬授文
忠自奪虜騎乘之文忠麾衆更進士卒皆殊死戰
虜遂敗走獲人馬以萬計曹良臣等死事聞

上命恤其家遣官祭塋各樹碑於墓道表之 征西

將軍馮勝自甘肅班師至京 靖海侯吳禎還京

師先是禎督餉定遼盡收遼東未附之地至是還

曰海內悉歸版圖固可喜亦可懼禎曰陛下威德

加於四海復何憂 上曰君天下者在德不在地

今之天下卽元之天下地非不廣而元主荒淫國

祚隨滅可不懼乎禎對曰聖慮深遠臣愚不及此

命賞征甘肅京衛軍士一萬四百三十五人白金四

萬四千兩時公侯都督指揮千百戶以匿所獲馬

騾牛半者不賞

上因諭之曰爲將者不私其身況於物乎昔漢祭遵
爲將憂國奉公宋曹彬平南唐所載惟圖書汝等
能法古人則令名無窮今之不賞汝等當自省之
諸將皆叩頭謝罪而退遣使與元幼主書曰朕
觀前代獲亡國子孫必獻俘廟社誇示中國其有
陽示優待者不久非鴟卽殺君家待宋幼主至削
髮爲僧終不免於一死朕則不然君之子至京今
已三年優待有加君宜遣使取歸朕本布衣生長

君朝混於民間豈有志於今日自辛卯盜起汝潁
靳黃間君家天運已去人心已離四海土崩民罹
荼毒朕始議興師保身救民一時僭稱名號者盡
爲俘虜君之父子亦不守宗社北遁沙漠此天運
非人力也故特致書以達朕意君宜察焉 又與
元臣劉仲德宋彥德二生書曰朕觀二生乃間氣
所鍾古今如二生者絕少何也至正之君蒙塵而
崩幼主孤弱大臣無不叛去獨二生竭力守護誠
可嘉尚今特遣使者諭爾君令取其子買的里八

刺歸二生宜察之母教人絕父子之倫爾君之宗
祀不絕二生之家族亦可長保如其不然中國六
軍出討旌旗數百里綿亘於陰山二生若忠於君
身膏草野名垂千載亦奇男子事也或不能殉國
偷生苟免將何面目與朕相見惟熟慮之 太僕
寺丞梁埜僊帖木兒言黃河迤北寧夏所轄境內
及四川西南至船城東北至塔灘相去八百里土
田膏沃舟楫通行宜命重將鎮之俾招集流亡務
農屯田什一取稅兼行中鹽之法可使軍民足食

從之

此經畧寧夏之始

淮安侯華雲龍鎮守北平遣使言

塞上諸關東自永平薊州密雲西至五灰嶺外隘口通一百二十一處相去約二千二百里其王平口至官坐嶺口關隘有九約去五百餘里俱繁擾衝要之地並宜設兵守之若紫荊關及蘆花山嶺尤爲要路宜設千戶所守禦從之

此經畧薊州及紫荊關之始

詔以大同極邊且去太原遠特置山西行都指揮使統之六年

上命魏國公徐達曹國公李文忠往山西北平等處

脩邊諭曰創業之初君臣固共艱難事平之後豈不欲少與之休息但居安慮危不可不慎今聞胡人窺塞有入寇之意再命卿等總率大軍往鎮邊隅然夷狄豺狼出沒無常但欲保障清野使來無所得俟其情歸率精銳擊之必掩群而獲鄉等皆老将臨機制勝熟矣非朕所能遙度者至邊宜先圖上方畧使朕覽之

夏四月北虜寇武朔時大將軍達屯臨清聞報即遣臨江侯陳德鞏昌侯郭子興禦之師至虜夜遁

秋八月北虜寇朔州指

揮謝彥破之禽其將知樞密院張寶院使哈喇叭
都叅政高惠并其部衆 冬十月副將軍李文忠
出塞擊北虜破之出朔州禽其太尉伯顏不花
十一月文忠已退師虜酋王保保復寇大同達乃
與文忠馮勝復去大同至備兒庄遇雪退壁于鴈
跽堡邏騎其平章鄧宇羅帖木兒達詰之知懷
柔有伏兵分兵掩擊禽其將康同僉保保夜遁
上以徐達等久出師遣使齎勅諭之曰卿等與朕平
定天下勲業已成而瑣瑣殘胡不能盡討致連年

出師勞民擾衆孰任其咎昔田單攻狄久之不下
問計於魯仲連仲連曰將軍在即墨時飲食起居
與士卒同甘苦身先士卒所以致勝今將軍東有
夏邑之奉西有淄上之娛黃金橫帶馳騁乎淄渰
之間有生之樂無死之心所以不勝也卿等皆起
布衣一旦至此遂忘昔日之艱難豈不犯仲連之
誚乎卿等宜益懋其功以副朕懷

上遣宦者咸禮表上花帖木兒送崇禮侯買的里八
剌北還厚賜之復遺其父愛猷識理達剌織金文

綺辭行

上諭之曰爾本元君子孫國亡就俘曩欲卽遣爾歸以爾年幼道里遼遠恐不能達今旣長成朕不忍令爾久客於此故特遣歸見爾父母親戚以全骨肉之愛又諭二宦者曰此爾君之嗣不幸至此長途跋涉爾善視之因致書於愛猷識理達刺曰昔君在應昌所遺幼子南來朕待以殊禮已經五年念君流離沙漠後嗣未有故特遣咸禮表等護其歸庶不絕元之嗣君其審之王保保定西之敗走

和林元君復任以事後從徙金山之北而死其妻
毛氏亦自縊保保驍勇絕倫致之不得

上嘗問諸將曰當今孰爲好漢或對曰常遇春所向
無前可謂好漢 上曰是奚足哉當今好漢只一
王保保耳諸將或有以功相誇者 上曰汝豈能
擒王保保來耶 上意蓋欲倡勇敢如此

命中山侯湯和潁川侯傅友德往延安防邊

上諭曰自古中國無事則四夷可以坐制今延安地
與胡虜接境虜人聚散無常若防之不嚴卽入爲

寇待其入寇而後逐之則塞上之民受苦矣特命卿等率衆至邊常存戒心雖不見若臨敵則不至有患矣 七年春正月虜數出沒北境詔副將軍

文忠北伐時文忠駐代縣乃分遣景指揮先發景

出白登遇虜敗之禽其國公孛羅帖木兒初設鴈

門關置守脩仍置守禦所隸代州振武衛

守脩初駐代州

後嘉靖二十三年移駐廣王城文忠以七月攻大寧克大石崖八

月至豐州擊虜破之斬其魯王及司徒答海俊平

章把都知院忽都得魯土妃蒙額及金印玉圖書

之類 北虜乃兒不花遣人款大同塞言欲降愿
以前犯塞獲罪

手詔諭之曰爾遣人自大同來言於平地駐牧意在
臣順却以前日犯塞之故懼不相容是何言也古
之爲天下者在安民而已無傷物心且爾元之故
臣幼君流離沙漠餘息尚存有所干犯爲其主也
亦何慮哉去就之機在乎識時能上觀天象下察
人情趨吉避凶斯智者矣 初元改雲州爲大同
路隸山西行中書省國初因之至是改行省爲布

政司改大同路爲大同府又于府置分巡按察司
歲差按察司官一員分巡號冀北道後專除八
年春正月征虜大將軍馮勝出大同塞擊虜定未
下散不刺地踰月還十年城蔚州指揮周房董
其後規制極壯麗基石甃磚阨樓櫓之類甲於
諸邊元君愛歆識理達刺俎

命遣使致祭禮部以道遠難至

上曰帝王以天下爲一家彼不出覆載之外何遠之
有自爲文祭之曰生死廢興非一時之偶然乃天

地之定數古之聖賢於是四者一或臨之不爲之
變何也蓋知天命而不惑者也君之祖宗昔起沙
漠彎弧矢入我中國橫行天下九夷八蠻盡皆歸
之非天命不至是也及至君父子正當垂衣守成
之時而盜生汝穎華夏騷然號令不行以至失國
此人事歟天命歟朕於其時非有三軍六師以威
天下乃代君家而爲民主亦莫非天命也曩者惟
君主沙漠朕主中國君與群臣乃固執不移致邊
警數興今聞君殞於沙漠朕用惻然特遣人致弔

奠以牲醴爾其監之

按野史載

太祖既有天下建廟以祀歷代帝王自伏羲以下像皆易成惟元世祖其面屢爲泪痕所汙塑工頻加修飾越宿則又如故也

太祖聞知幸廟以手指曰痴達子痴達子汝何人入主中國可謂幸矣今不革去者以爾亦一代之王朕今天命人歸奄有天下於汝子孫不加殺戮但驅還北則朕之待勝國亦可謂有恩矣汝

何恨耶母再啼哭於是塋工明日遂奏世祖面
無泪矣

勅送故元官蔡子英歸塞北子英河南永寧人元
季舉進士爲擴廓帖木兒所知薦用是累遷顯官
王師征定西擴廓帖木兒軍敗子英單騎走關中
入終南山有司以形求得之械送京師至江濱亡
去至是陝西又捕得之械過洛陽遇湯和不爲禮
和怒焚其鬚懾之終不屈其妻適過洛陽聞子英
至欲與相見子英避不肯見至京

上命釋之授以官英不受退而上書曰伏惟皇帝陛下乘時而起提三尺劔削平群雄混一四海九夷八蠻莫不賓貢英金魚漏網假息南山曩見獲河南拘送京師垂及渡江復得脫亡七年之久動勞有司既遠陛下又忤大臣揆之常情雖死罪不足以擬英而陛下以萬乘之尊全匹夫之節不降天誅反療其疾易以冠裳賜以酒饌授以名爵陛下之量可乎天地之外矣英感恩無極非不欲竭犬馬之力以報覆載之仁但以名義所在不敢改其

初志自惟家本布衣遭值亂離操戈行伍智識粗
淺過蒙主將知薦仕至七命躍馬食肉十有五年
愧無尺寸之功以報國士之遇及國家板蕩又復
失節何面目見天下士所以寧死不敢有他志蓋
臣之事君猶女之適人一與之醮終身不改事君
之道一食其祿終身無二昔馮道歷仕五朝司馬
光曰不正之女中人羞以爲室不正之士中君羞
以爲臣偉哉言乎管子曰禮義廉耻國之四維四
維不張國乃滅亡陛下金城湯池兵極其精噐極

其利府庫充實米粟紅腐國家之盛古未有也猶以爲未足於是興學校明人倫褒死節獎忠義蓋謂治天下之本莫大於禮義庶耻也夫以今天下之廣人民之衆旣不以英一人而加少又豈以英一人而加多授英以官何益於國舍英不用何損於事陛下創業垂統正當提挈大經大法以昭示聖子神孫功臣賢士不宜以無禮義庶耻之俘虜而廁於維新之朝賢士大夫之列也英自被獲以來日夜所思惟追咎昔之不死以爲今日惟死可

以塞責陛下廼待英以禮沐英以恩臣固不敢實
死以示名然亦不敢全身以苟祿若察英之愚全
英之志禁錮海南以終薤露之命則雖死於炎瘴
亦感恩極矣陛下之威加于海內而奔走四夷不
患不行於匹夫之賤然英聞仁者不中道而改節
義者不苟生以圖榮勇者不見幾而不作故王蠋
閉門以自縊李芾闢門以自屠彼非惡安逸而樂
危亡顧義之所在雖湯鑊有所不避也耿馬之軀
仰止古人死有餘恨冒瀆天顏伏俟鈇鉞不知所

言

上覽奏而益重之命館於儀曹忽一夜大哭不止人問其故子英曰思舊主耳語聞上知其志不可奪勅有司送之出塞

按武王釋箕子之囚復商容之位此其爲再見矣培養元氣以固國家靈長之命脉非與天地合德者其孰能與於此

十四年夏四月北虜寇開平指揮使丁忠擊敗之戰于氊帽山斬獲數百十八年大學士宋納上

守邊策畧曰今宇內又安蠻夷奉貢獨沙漠未遵
聲教若置之弗治恐邊圉漸荒歲久滋患若窮追
遠擊恐士馬疲費餽餉艱難陛下爲聖子神孫萬
世計莫若求守邊之策耳盖守邊固先乎足食足
食又先乎屯田今諸將豈皆借才於異代哉宜選
智勇謀略者數人每將以東西五百里爲制隨其
遠近高下分屯所領衛兵斟酌損益率五百里爲
一屯彼此相望首尾相應耕作以時訓練有法遇
敵則戰寇去則耕此長久守邊之策也

上善其言 命馮勝爲征虜大將軍傅友德藍玉爲

左右副將軍趙庸王弼胡定郭英爲左右叅將商
嵩叅贊軍事率師二十萬討納哈出又命李景隆
鄧鎮吳良等皆隨征師行納哈出棄金山巢穴營
於新泰州去遼陽千八百里 初納哈出分兵爲
三營一曰榆林深處一曰養鶯莊一曰龍安一禿
河輜重富盛畜牧蕃息虜主數招之不往及是大
軍將逼之納哈出計無所出乃刺吾因勸之降納
哈出猶豫未決勝遣指揮往諭之納哈出乃遣使

至勝營陽爲納款而實覘兵勢勝遂遣王往一禿
河受其降虜使見勝還報納哈出聞之指天噴噴
曰天不復與我有此衆矣遂率數百騎自詣王納
降王大喜出酒與之飲甚相歡納哈出顧其下咄
咄語將脫去時鄭國公常茂在座其麾下解胡
語者以告茂茂直前縛之納哈出大驚起欲就馬
茂拔刀砍之傷臂不得去耿忠遂以衆擁之見勝
納哈出所部妻子將士凡十餘萬在松花河北聞
納哈出被傷遂驚潰勝遣前降將觀童往諭之於

是其衆悉降勝以禮遇納哈出復加慰諭令耿忠
與同寢食遣使奏捷于京遂班師悉以納哈出來
降將卒妻子及其輜重俱南行仍以都督濮英等
將騎兵三千爲殿納哈出之衆有竄匿未降者恨
大將軍以其降衆俱南乃設伏於途候大軍過而
邀之英等後至伏發英猝爲所乘衆寡不敵遂見
執英絕食不言乘間自剖腹而死英廬州人少以
勇敢聞累功陞中軍都督僉事至是沒于虜

上聞之驚悼追封金山侯謚忠襄

上聞馮勝等在軍事多不律遣使勅諭勝及傅友德等曰古之名將爲國効忠勲名千載在我朝若徐達常遇春平定夷夏未嘗行一不義所以功成名遂近以沙漠未清命爾等率師何馮勝膺大將軍之任而乃專爲已私播惡胡中降虜致恨古之名將豈如是耶及旋師之際部伍無法致使濮英等人馬三千陷沒于虜又不聽朕命擅發留守太寧軍卒遂遺殘胡後患凡若此者論以國法皆在不宥朕以將軍嘗有戰功姑容自新若改行易慮庶可

保全以圖後功往來人言頗多舉其大槩於將軍
亦報哉 常茂勝之婿也勝每於衆中卑折之茂
不堪出不遜語勝啗之及濮莖死勝欲自解故歸
咎於茂而奏其驚潰虜衆詔械茂旣至茂陳其故
上曰如爾所言勝亦不能無罪命收其總兵官印召
勝還令藍玉行總兵官事納哈出等赴京入見
上賜納哈出以一品服封爲海西侯其所部官屬悉
賜衣服冠帶授以指揮千百戶有差俾各食祿不
任事分隸雲南兩廣福建各都司處之納哈出尋

卒其子察罕襲封瀋陽侯茂坐前罪當誅

上念其父遇春之功釋之安置于廣西之龍州建

北平行都指揮使司於太寧勝至京

上以其勲舊不加譴命建第鳳陽奉朝請故元四

大王來降

上以其元之子孫憫而有之且厚其賜賚命隨西平

侯沐英戍守雲南大將軍藍玉送降胡寡婦一

百六十二人至京命以文綺帛衣四百八十餘襲

鈔一千二百三十錠給賜之二十年冬聞漠北

復立脫古思帖木兒爲主遣永昌侯藍玉討之王
得降人脫脫等言故元丞相哈剌章等遁入和林
乞進兵共勦二十一年春遣定遠侯王弼等七
將軍從征四月聞虜主在捕兒海兼程進至百眼
井哨不見虜將還弼曰吾等深入徒勞師旅將何
以復命哉復遣偵知虜營在海東八十里直薄其
營始虜以我軍乏水草必不深入大軍忽至其酋
大尉蠻子率衆拒戰被殺虜主與其子天保奴知
院捏怯來等遁去獲其次子地保奴妃子等六十

人及故太子妃公主吳王代王等三千六十人軍士男女八萬得寶璽金銀印圖書牌面百五十三車三千輛馬駝牛羊十餘萬又破哈刺章營六月獻俘京師命有司給第餼養方大軍之度嶺也進次遊魂南道無水將士渴甚至一小山忽聞有聲如礮使人視之則四泉湧出土馬就飲得不困乏餘流溢出成溪先是

上嘗夢殿西北隅有小泉流出至御足下至是適與夢符王等還

上大喜擬封梁國公既有言主逼私元主妃者
上怒謂王曰爾北征功大但虜主妃降不能遇之以
禮又恃勞遣人入朝覲伺此豈人臣之道哉今屈
法宥爾爾其率德改行以慎厥終改封涼國公仍
鑄其過于券宴征北諸將於奉天殿

賦平胡詩二章命群臣和之 元主妃愧王事自
殺地保奴由是有怨言乃遣使護送琉球安住
二十二年六月捏怯來等遣人降知虜主至和林
爲也速失兒所害 藍王定遠人其姊歸常遇春

胡陳之黨王嘗預焉

上以開平之功宥而不問征陝西取獲月魯帖木兒
還意覬陞太師將命爲太傅王怒退語所親曰
上疑我矣時鶴慶侯張翼侍郎傅友德等及諸武臣
嘗爲王部將者晨夜會王私第爲錦衣衛指揮蔣
璈告變命群臣訊狀皆伏誅

按野史載王往見鐵冠道人鐵冠草鞋出迎之
王遽云著草鞋以迎賓足下無履言無禮也王偶持
椰盃勸酒鐵冠即云執椰盃而勸酒尊前不鍾

言不終也未幾王果就戮鐵冠固前知耶又聞

太祖克金華召一星者劉日新推命荅曰將軍當極富極貴又推諸將校則言或爲公或爲侯

太祖怒其不言官職劉請屏去左右曰極富者富有四海極貴者貴爲天子

太祖大喜洪武四年召至問欲貴乎曰不願欲富乎曰不願問何欲曰臣所欲者求一符可以遍遊天下耳

太祖因以手所揮白扇題曰江南一老叟腹內羅星

斗許朕作君王果應神仙口賜官官不要賜金
金不受持此一握扇橫行天下走識以御寶劍
持此遍遊十二年回家忽對妻子言我當死於
非命故歸欲作別去遊京師妻留曰既當死死
於家耳荅言當死於京遂至南京都市中但講
命而已蓋先被旨不許與人笑故也藍玉平雲
南田因詣劉言將軍將星見梁地當封梁國然
七日必有一險我當與將軍同死後果封爲梁
國公侍朝穿紅袍在西班時日照映

上目之曰此將軍不獨外邦人畏之朕亦膽寒矣有
張尚書者同往雲南與王不睦對曰此人
陛下前不妨但恐非少主臣也

上由是欲誅之因潛令科道糾王科道問張尚書何
以爲罪張第言軍還不交軍欲乘此作亂耳王
臨刑時嘆曰神乎劉先生之言

上聞因逮劉至問汝與王美命對曰曾美又問汝命
盡幾時曰盡今日因殺之今其家子孫猶在賜
扇尚存

二十四年春三月傳友德北伐駐師開平因命齊王以護衛兵至開平閃獵

勅曰山東都司各衛騎士皆從友德調發軍政爾毋有與遇戰可自爲隊或在其左或在其右有膽畧則當前無膽畧則繼後奏凱之時勿自矜伐與諸將分功八月秋高可以師旋

按此因山東騎士悉發北征因命齊府以護衛至也夫齊稱東秦人急功利故北征賴之親藩身將護衛悉行所以均勞逸習地利也今河南

班軍猶存此意而練習之政漸弛技擊之長靡效失本意矣

二十五年春三月安慶侯仇政西涼侯濮璵來宣府理武備以沿邊諸州武備漸弛分遣重臣理之政理振武朔州璵理岢嵐蔚州都督劉真指揮使李彬來宣府行障塞歷宣德興和雲州大興保安龍慶懷來諸處度量城隍增設險隘

上諭宋國公馮勝隸國公傅友德曰屯田守邊今之良法然寓兵於農亦古之制今與其養兵以困民

曷若使民力耕而自衛爾等宜從山西布政使司
集守令耆老以朕意諭之乃分命開國公常昇定
遠侯王弼全寧侯孫恪鳳翔侯張龍等往平陽等
府安慶侯仇正懷遠侯曹興等往太原等府閱民
戶四丁以上者抽其一爲軍蠲其身徭分隸各衛
赴大同等處開墾荒田東勝與大同城中各立衛
五大同北境立衛六戒其屯耕所在毋擾於民遣
都督周興總兵討故元逆臣也速迭兒先是藍玉
北征元主脫古思帖木兒遁至也速迭兒部爲其

所弑其衆悉奔散來附是歲興等進討追至徹徹
兒山大敗之自是虜不敢近邊者十餘年二十六
年置宣府前左右衛於宣德府萬全左右衛於宣
德縣懷安衛於懷安民戶不足調山西諸處餘丁
實之二十七年春三月初谷王封于宣府以舊城
隘至是命增大之都督真指揮使彬役所統展築
今城及德勝口二十八年春三月城懷來役北平
都司燕山諸衛軍

按十五年以後宣府之經畧置衛成城大抵皆

劉李二公之盡也夫不急其工舉恒春暮無妨
猷畝後以部兵斯其爲國初人物也與

三十年夜有星大如雞子尾跡有光自天厨入紫
微垣後有二小星隨之至游氣中沒

上勅成祖

時爲燕王
上第四子

及晋代遼寧谷六王曰稽之歷

代天象若此者邊戍不寧往往必驗今天示象與
往昔正同不可不慎也其應雖非今歲然二三歲
灼有寇邊者宜令軍馬東西布列各守其地兵法
云致人不致於人多算勝少算不勝况無算乎吾

今老矣精力衰微難於運籌爾等受封朔土藩屏
朝廷若不深思遠慮倘或失機誤事非惟貽憂朕
躬爾等安危亦係於是可不慎哉吾今畧與爾謀
倘遇胡騎十數萬寇邊不宜與戰收入壁壘或據
山谷險隘之處夾以步兵深伏以待彼見吾不與
戰必四出抄掠俟其驕怠分散我以馬步邀截破
之必矣若一見胡馬輒以三五千或一二萬輕與
之戰豈特不能勝必至於失利

成祖時爲燕邸及代遼寧谷王率都督楊文武定侯郭英

來備北虜時塞下屢警詔戒祖曰聞烽火警數此
月虜之詐欲誘我師出縱伏兵也可西涼召莊德
張文傑二指揮開平召劉真宋晟二都督遼東召
武定侯郭英會兵處步軍須十五萬布陣以待武
定侯與劉宋翼於左莊張與指揮陳用翼於右爾
與代遼寧谷五王居其中彼此相護首尾相掇無
不勝矣復勅都督楊文以北平都司行都司燕谷
寧護衛精銳從

成祖勅武定侯郭英以遼東都司遼護衛精銳從遼

王悉至開平相擇險要屯備一切號令悉聽

成祖節制三十一年城陽和天戍衛

上不豫賜勅

成祖曰朕觀成周之時天下治矣周王猶告成王曰
詰爾戎兵安不忘危之道也今雖四海無事然天
象示戒夷狄之患豈可不防朕之諸子汝獨才智
克堪其任秦晉已薨汝實爲長攘外安內非汝而
誰已命楊文郭英并遼府護衛悉聽爾節制爾其
總率諸王相機度勢用防邊患又安黎民以答上

天之心以副吾付托之意其敬慎之勿怠

上進齊泰爲兵部尚書嘗召齊泰問邊將姓名泰歷數無遺又問諸圖籍泰出袖中手冊進簡要詳密上大奇之 閏五月 乙酉召齊泰受顧命輔皇太孫 上崩於西宮壽七十一遺詔皇太孫嗣位

按

聖初之攘胡元也旣逐之出境矣然於其父子生則有書諭之使死則有弔祭之禮焉俘其孫復封之旣封之後復歸之所以待亡國其恩甚厚至

於邊防則屢添衛增戍以定兵屯田以足食數遣功臣視師而邊將警愾命親王出塞而武備揚威凡可以慎固封守者無不曲盡雖在彌留而未嘗倦勤所謂一息尚存此志不怠若是者蓋其得之也艱故其防之也切慮之也遠故其謀之也深使後世守其成規不愆不忘則瀚海末清幕南末空矣安有所謂烽火通井泉也哉又按是時建六王于邊地而末命獨委重于燕即蓋

聖祖知燕王雄畧神武足以係單于之頸而宿將重
兵遂得藉以爲龍飛之資豈非天命攸在假之
羽翼哉史載

聖祖嘗欲易儲立燕王爲太子問高后后曰幸
無洩又密問侍臣曰太子卒皇孫弱立燕儲可
乎學士劉三吾曰皇孫尚富春秋徐俟其成立
嫡孫禮也乃止及疾亟遣使持符召燕王來
至淮安用事者矯詔却回臨終問曰四子來未
聖祖之屬意有在矣事雖中阻其如天命何

三十二年

成祖由紫荆歷廣昌尉州進幸大同諸將張玉朱能薛祿陳亨一子愆皆以兵從

按此靖難之師也蓋自河南畫後顧之謀而東催剡門之師東平奔鄭村之陣而西收雲中之助由是鼓行以南遂下鎮定也於戲薊寧者燕都之左藩宣大者燕都之右翼耶

成祖開創之規模非後世培植之大較乎今宣大雖重鎮而士馬日耗薊寧雖近地而經畧漸廢且

朶顏漸偃強雲中數反側則犯人者何能無戚
戚也

三十三年北虜國公趙脫列于司徒劉哈刺帖木
兒等率衆至北平助靖難兵

成祖太加賞賚旣而謀報胡寇將侵邊

成祖以書諭韃靼可汗坤帖木兒繼脫吉思帖木兒立者并諭

瓦剌王韃靼別部猛哥帖木兒等以禍福

按

太祖初封諸王各以一高僧相之時姚廣孝預語

成祖曰殿下能討臣輔佐當使戴一白帽

王字上于加白字

是奏討之及至藩又告曰浙東袁珙

即柳在天下

相法第一乞假以其名隸尺籍勾取到燕使相

之珙至見上因極道天表之盛曰髯過膺必登

大寶爲二十年太平天子後建文間朝廷多大

防燕燕亦逡巡未舉指揮張王進曰安可束手

待縛遂奪九門殺三司一鼓而兵出矣是知

成祖之有天下始于姚定于袁成于張也然非姚則

不萌非袁則不決非張則不聚豈非天意有在

而致此三人之言耶 寓圃雜記曰自五代以
來北虜侵我疆土索我金帛以宋太祖太宗之
繼興終不能制下至靖康之變尤不忍言蓋由
都非形勢之地也胡元據有中國垂九十載無
復天理之可言天生我

太祖掃除之推戴之初即欲宅形勢以臨中夏禦夷
狄故嘗幸汴幸關陝而還斯時中原之地久爲
胡馬所踐繼以寇盜民不料生六駢所過率皆
空城於是定鼎江南以資兵食而都北之志未

嘗一日忘也且以燕城爲元舊都形勢可以制虜因以封我

成祖焉及上登極卽廣舊卽爲皇城頻年駐蹕當時群臣不知虜意所向屢請南還因出令曰敢有復謀遷者論以妖言於是河南布政使周文襄等皆遭重罰自此基命始定遂成萬世之業雖敵函之固莫能及矣永樂壬辰之後頻征沙漠搜勦遺孽屢抵巢穴而歸是則都燕之志

太祖實啓之成祖克成之祖宗之功德盛矣